

Headline	Penduduk bergelap, peniaga rugi		
MediaTitle	Sinar Harian (Kelantan)		
Date	14 Feb 2018	Language	Malay
Circulation	160,000	Readership	509,000
Section	News	Page No	18
ArticleSize	444 cm ²	Journalist	ROSALWANI CHE
PR Value	RM 10,560		



Penduduk bergelap, peniaga rugi

Penduduk dan peniaga alami kerugian apabila bekalan elektrik lebih voltan

ROSALWANI CHE SOH

KOTA BHARU- Lebih 100 penduduk termasuk peniaga di Kampung Parit, Pasir Tumboh di sini terpaksa bergelap, selepas menghadapi masalah bekalan elektrik lebih voltan dalam kejadian pagi Isnin lalu.

Seorang peniaga kedai makan, dikenali sebagai Siti, 30, berkata, kejadian kira-kira jam 4.20 pagi menyebabkan lebih lima unit lampu kalimantang yang dipasang di kedai makannya meletup.

"Kejadian ini merupakan yang pertama kali berlaku sepanjang saya berniaga di kawasan ini dan ia turut merosakkan penghawa dingin, peti sejuk beku dan televisyen.

"Setakat ini kami telah menggantikan penghawa dingin dengan yang baharu dan ia membelanjakan lebih RM2,000 serta turut menggantikan lampu kalimantang yang meletup.

"Kami telah ajukan perkara ini kepada pihak Tenaga Nasional Berhad (TNB) dan akan buat laporan polis," katanya.

Sementara itu seorang penduduk Nor Ashikin Mamat, 26, berkata, keadaan adiknya yang mengalami masalah saraf dan bergantung kepada mesin pernafasan untuk mendapatkan bekalan oksigen menjadi masalah utama selepas



Komputer riba penduduk rosak akibat masalah lebih voltan dalam kejadian di Kampung Parit di sini.

mengalami gangguan bekalan elektrik dipercayai akibat masalah lebih voltan itu.

Adiknya, NorAtikah Mamat, 21, perlu menggunakan mesin oksigen untuk bernafas setiap masa ekoran mengalami masalah kekurangan oksigen dalam paru-paru.

"Ekoran kejadian berkenaan, dua mesin yang digunakan ter-

masuk mesin oksigen dan mesin mengawal suhu oksigen yang digunakan juga rosak dan tidak dapat digunakan lagi.

"Kini kami terpaksa mendapatkan dua mesin baru yang dipinjamkan melalui tabung kebajikan hospital dan kedua-dua mesin itu kosnya bernilai RM45,000.

"Jadi kami berharap masalah



Seorang pekerja kedai makan di Kampung Parit menunjukkan peti sejuk rosak selepas kejadian pagi Isnin lalu.

ini dapat diselesaikan ekoran ia menyebabkan kami terpaksa menanggung kerugian akibat kejadian itu dan turut mengundang masalah kepada golongan pesakit kronik yang perlukan bekalan elektrik ekoran terpaksa bergantung kepada mesin oksigen dan harap dapat pampasan sewajarnya daripada TNB," katanya.

Pengurus Besar TNB Kelantan, Datuk Ir. Md Yuslan Md Yusoff berkata, pihaknya ada menerima laporan berhubung kerosakan sistem pemasangan TNB.

Menurutnya, pihaknya kini telah pun membaiki sistem terbabit dan turut akan mengambil tindakan susulan terhadap tuntutan pampasan penduduk.